

Midada da generaziun tar la Quarta Lingua

■ (cp) L'uniun da promoziun Quarta Lingua vegn da nov presidiada da duas romanistas: **Bettina Berther, Lucerna, e Barbara Strebel, Turitg. Ils 10 d'avrigl han ellas surpiglià il presidi sco successuras da Madlaina Peer e Kaspar Silbersch.** A chaschun da la radunanza generala 2013 è vegnida elegida la giurista *Petra Camathias* sco nova commembra da la suprastanza.

L'onn 2012 ha la Quarta Lingua (QL), fundada dal 1972 a Turitg, assegnà contribuziuns da promoziun per radund 12 000 francs. In terz han survegnì las duas victuras dal premi da renconuschientscha «40 onns Quarta Lingua», las giuvnas Rumantschas Bettina Vital (Ardez/Turitg) e Lia Wyss (Trun). Sper ellas èn vegnids onurads er ils dus commembers dr. iur. Roman Truog e dr. med. Anne-Marie Hew che han bandunà la suprastanza suenter blers onns en uffizi. Nova commembra da la suprastanza è l'advocata dr. iur. Petra Camathias Ziegler (1971) che è creschida si a Trun ed ad Arosa.

Cun l'elecziun da *Bettina Berther* (1977) e *Barbara Strebel* (1978) sco novas copresidentas da la QL ha gi lieu ina roschada a l'intern da la suprastanza. *Madlaina Peer* e *Kaspar Silberschmidt*, che han presidià l'uniun per tschintg onns, restan vinavant commembers dal gremi operativ. Quel vegn cumpletà da dr. *Linus Bühler* (actuar), *Nathalie Killias* e *Barbara Kürz* che èn tuts vegnids reelegids.

Actualisaziun dals statuts: Sustegn dals idioms e dal RG

Avant las elecziuns han ils delegads aderi ad in'actualisaziun da l'artitgel d'intent en ils statuts da la QL. Il nov passus tegna quint da las differentas pussaivladads d'expressiun resp. d'intermediaziun culturalas e precisascha la politica da promoziun da la suprastanza dals ultims onns: Sper la premissa obliganta da duvrar il rumantsch en furma scritta, discurrida e/u chantada fa il sustegn da projects en tut ils tschintg idioms ed en rumantsch grischun part dals criteris.

www.quartalingua.ch